



DEO OPTIMO MAX.

UNI ET TRINO,

VIRGINI DEI-PARÆ, ET S. LUÆ,

Orthodoxorum Medicorum Patrono.

QUÆSTIO MEDICO-CHIRURGICA:

QUOD LIBETARIIS DISPUTATIONIBUS

*manè discutienda, in Scholis Medicorum, die Lunæ decimæ-septimæ
mensis Martii, Anno Domini M. DCC. LXVI.*

M. PHILIPPO QUERENET, Doctore Medico,
Præside.

Utrum in Ascite Paracenesin tardare, malum?

I.



UBULIS constat & humoribus corpus organicum. Ejus harmonia ab utrorumque motu pendet. Quæcunque de causâ è vasis contrâ naturam humor exeat, is vitatur, nisi resolutioni cedat. Fluctuat, suppurat, induratur humor, & tumorem facit. Multiplex tumor est. Vel à partibus, vel ab humoribus ortum habet. A duris partibus, ossium luxationes, nodi, exostoses:

A mollibus, verarum omnis Herniarum species, ab Omento, Intestino, utroque; & Ventriculo etiam & Vesicâ. A quatuor humoribus Antiquorum sat belle indignantur tumorum natura, genus; indoles. Phlegmone à Sanguine: à Bile Erysipelas: Oedema, à sero; à Melancholico humore Schirrus. His-ce si jungatur partium varios humores excipientium varia conditio; innumeri alii constituuntur tumores. Signa, quæ ad curationis modum, speciem, tempusque ducunt,

desumuntur ex lætionum variatione. Taxi, aut incisione; curatur Hernia, quæ vera est: aliisque tumoribus tractandis, rarè sufficiunt Dietæ & Pharmacia. Plurisque curandis, ferro & igne plurimum præstat Chirurgia, tertia Therapeutices pars. Synthesi separata conjungit; Diæresi conjuncta separat; Exæresi intus superflua extrahit. Tres licet operationes discernuntur, ad perficiendum opus idem haud infrequenter consociari amant. In teli extractione in corpus immissi; Calculi ex Urethrâ aut Vesicâ; Aquæ, Sanguinis, Puris, è quâdam cavitate; id probatur ultrò, liquetque in Paracentesi. Hæc, Latinis punctio, Exæreseos est species, quæ eo peragitur temporis puncto, quo Diæresis, Continui separatione factâ, superflui sit ablatio. Sed morbi tempus in quâcumque operatione faciendâ, debet eligi. Vel occasio, vel opportunitas curationis anima est.

I I.

HUMOR quilibet extrâ vasa latitans, durâ mollive parte conclusus, nisi discutatur, arte educendus est. Ab ictu, aut casu violento, concutitur cerebrum: largâ tunc manu mittitur sanguis, vulneraria adhibentur. Hæc omnia sapienter tentantur initio: at imperitè, si sola, & funestè tandem; nisi sat citò detur via Terebratione, quâ sanguis, in pus flecti cereus, ejiciatur forâs. In Hydrocephalo, par operandi modus; cerebri substantiam humor modò non penetrat. Empyema, sectione pectoris; Leucophlegmatia, tibiæ Scarificationibus; Hydrops oculi, Punctione; Ascites, Paracentesi curantur: sed omnes ex opportunitate. Pus & aquam educebant veteres Medici. Sine ferro primum, exin cum ferro imponebant Cucurbitulas, ferramentisque candentibus partes exulcerabant: At curationem seriùs auspicabantur. Indè ex leniori humoris educatione, ulcere diuturniori, miserè solvebat morbum Sphacelus frequens. Recentiores Medici, Suppuratos & Hydropicos securiori viâ, minori tœdio, ac dolore leviori, sublevant. Scalpello, Lanceolâ, instrumento tandem Tricuspide, aut Veruculo, cum argenteâ fistulâ ex utroque extremitatis latere perforatâ, absolvunt opus. Qui Veruculo utuntur, rectiùs agunt. Integumentorum fibras separant, non secant acumine rotundo, citiùsque sanatur vulnus. Non ampliùs forsân perficienda operandi methodus; sed nondum perfectus operationum usus. Pluræque feliciores essent, atque Paracentesis, si tempore celebrarentur convenientiori. Medici est, non tantum ea, quæ antè pedes modò sunt, videre; sed prospicere futura. In Lithotomiâ, absque maturâ præparatione sapientique consilio, necatur æger. Aut miserè avellitur, aut fingitur calculus; & pro salutè mors est. In magnis vulneribus, aut cum, aut sine fracturis; & ab initio, & ad animi deliquium extrahitur sanguis. Sic, quæ solitò sunt Symptomata, cessant; quæ subsequi solent, præcaventur.

I I I.

VISCERIBUS quamplurimis refertum est abdomen, vitiis indè quamplurimis, innoxium. Hæc inter, varia sunt hydropum genera. Horum contrâ naturam affectuum causæ, læsa sanguiferorum, lymphaticorumque structura; Viscerum obstructio. Tunicis vasa constant retium instar contextis. Quod sanguis diutiùs hæret, eo magis hiat tunicarum textura, diffusitque serum copiosius. Ligata in cane vena jugularis factum probat. Cutem inter capitisque membranas & musculorum colli interstitia, serum diffunditur. Lymphatica, si absque ruptione, dilatentur ultrâ modum; cystide conclusus aqueus humor magno crescit volumine, Hydatidasque procreat. Viscerum obstructio impedimenta parit sanguini. Hinc hydrops, qui ab ictu, lethalis. Dissectis Hydropicorum cadaveribus, in Abdomine tumores varii, frequensque Schirrus. Vitiato diutiùs fibrarum tono, interpositis undique obicibus, patentiore sunt tunicarum pori, morâ ampliantur viæ procliviores. In Leucophlegmatia venter intumescit, &

corpus univcrsum : In Tympanitide, tumet flatibus : In Ascite, sæpiùs Sero, Chylo rariùs effuso, solus primùm distenditur. Hydrops ille, quo, ut in utre, Aqua continetur, sedem habet eo in spatio, quod Peritonæum inter & Intestina vacuum est. Extremis levibusque digitis uno percussus latere Venter, in altero sensum præbet humoris fluctuantis intus. Aquosus ille tumor, retardatâ convenienti curatione, sensim increfcit. Abdomen præter, & Pudenda, & Femora, & Pedes occupat, totumque corporis habitum afficit. Jam vehiculo defraudatur purpureus latex, hæret ubique; & dùm diffuso latere sero immergitur machina, sanguis crassitie mentitur in vasis corallum. Ingruunt febricula, ut plurimùm urens; vehemens sitis; Urina admodùm pauca, crassa, lateritia; spirandi difficultas; corporis in superiori parte marcor; molesta Tussis. Tot lethalia, Paracentesi præcaventur tempestivè factâ. Mochlica his in casibus propinare, sanguinem est exprimere quasi torculo. Sic curati, sanguinis ictu repentino sæpè tolluntur. Asciti igitur vetusto nimis, vel recentiori, impar est Punctio. Aut jam desperatus, aut nondùm factus est, morbus. At, ubi primùm est vera certaque feri fluctuatio, constans Ascites declaratur. Hic, adhibitis incassum interioribus remediis, punctum est non procrastinandæ Paracenteseos.

I V.

DETECTO opportunitatis Momento, quis locus Abdominis perforandus? Peculiaris tumor, ab Hernioso, fluctuatione dispar, Punctionis locum notat. Alba linea si prominet, absque periculo pungitur. Umbilicus ob Exomphalon; Intersecciones tendinosæ, Rectus Abdominis musculus, propter difficiliorem Synthefim, Vasa sanguifera, ob Hæmorrhagiam, ferro attingi nunquam debent. Tuta celebratur Paracentesis medio in spatio, quod anteriorem ossis Ilei Spinam inter & ultimam costam jacet. Decumbente ægro in latum, non sedente; parte prominenti manibus aquarum collectionis ergò compressâ priùs: inibi hæud timide perforet Artifex. Perforssis Abdomine & Peritonæo, illæsis semper intestinis, retrahitur Veruculum: argentea Fistula, mundata priùs, quâ eliciuntur aquæ, in foramine relinquitur. Intacto Peritonæo, nullus, negatâ viâ vacuatur humor. Ideo alterâ Punctione factâ paulò infrâ primam, Veruculo longiori perforatâ tunc membranâ Abdomen intus succingente; Aquæ fluentes, usque dum spontè definant, educendæ sunt. Unâ vice, veteres Medici licèt reformidaverint, Humor emittitur. Quandoque tamen mucosa quâdam colluvies, Intestini Omentive pars, quid Pinguedinis ostia canaliculi præcludit, & sistitur Serum. Obex faciliè tollitur: immittitur in Fistulam specillum, & fluunt Aquæ. Sub operationis finem, manibus Abdomen premitur paulò fortius. Ità exactius continentur viscera, exprimiturque serum. Missis aquis, tollitur canaliculus Vulnuscum splenio aquâ vitæ madido obducitur, & faciliè coit. Pendente à scapulis fasciâ firmatur interdum mantile corpori circumcinctum: Hoc item, dùm eliciuntur Aquæ, adhibetur tutò. Per gradus ità compressis, & Diaphragmate, & Abdominis musculis, & Visceribus, præsertim Hepate, Lipothymia præcavetur à Respiratione læsâ. Eductus Humor, quid inde futurum, indicat. Cruentus, Purulentus, Fætidus, Chylosus, humore multiplici permixtus: mali ominis est: Boni verò ferosus, lotio similis, non fæctens, non copiosior, Euchymis recreetur æger, iisque utatur, quæ Ascitis fomitem debellent.

V.

ANTIQUORUM nonnulli, membranam Peritonæi inimicam Punctionis; Paracentesi spiritus excludi, Infirmari vires, Aquam jecinore affecto frustrâ emitti, pronuntiabant. At, Peritonæum, & in Gastro-raphiâ coalescit: Spiritus & vires non magis infirmantur, quàm in Phlebotomiâ; Ascites jecoris unitus non vitium est; ex affecto splene, totiusque corporis malo habitu fit. Inanis

igitur timoris est talis cautio. Timendum immò, si tardius expellatur fluctuans humor, morà ne noceat diuturniori. Licet non semper sanet extractus, detedo electoque morbi tempore; in Paracentesi tamen una salus. Levat agrum Aquarum Eductio; locumque facit Medicinæ, quam inclusus intus humor impedit, Asclepiades, Soranus, Themiso, aliique, hâc curatione meritò aduersati sunt Erasistrato, Evenori, Thessalo. Testantur sat citò factâ Paracentesi, non paucos evasisse; plurimosque, tardante consilio medentium, mori. Elatere Solidorum in dies magis debilitato, fibrarum fit Atonia. Perverso præpedito ve muscularum Abdominis, Diaphragmatis, Pulmonum, motu: Excretiones singulæ, omnisque generis feriantur vitianturque secretiones. Peraçtâ seriùs Paracentesi, prima citò redit morbi facies & aquosus tumor. Interrupto diutiùs serum inter & vasa commercio, nullos tandèm datur derivationi locus. Stagnat hebes humor; serum corrumpitur; contingitque tabes, quæ Medicinam nescit. Vitium in substantiâ partium emendare, nùm humanæ virtutis est? Quorum stomachus jam corruptus est; Qui ex atrâ bile, aut obstructione, vel scirrho veteri in Hepate, Liene, Mesenterio, Pancreate; Qui malum corporis habitum habent, exhausti inediâ; Qui, aut senes, vel à morbo jam verusto, juniores licèt, hùc deciderunt; Paracentesi fortè allevantur, sanantur nunquàm. Quibus immò observantur iis contraria; illi sanari possunt, & plerique sanantur. Natura vigens adhuc spontè, Diarrheâ, Urinæ fluxu, Metastasi, Ictu fortuito, Criticam hanc aquarum egestionem molitur. Sic Medicina, Naturæ Imitatio est.

Ergò in Ascite Paracentesim tardare, malum.

DOMINI DOCTORES DISPUTATURI.

M. Carolus - Ludovicus- M. Joannes-Baptista- Ale- M. Petrus POISSONNIER;
Franciscus ANDRY. xander MAIGRET. Regis in Sacro Consistorio

Consiliarius, Regi à Consiliis Medicis, in Regis Arcibus Mariimis & Colonis totius Medicina Præfectus, Imperialis Academia Petropolitana, necnon Regiarum Stokolmiensis & Divionensis Academicarum Socius, Professor & Censor Regius.

M. Mathæus - Thomas M. Josephus PHILIP.
LACASSAIGNE.

M. Antonius LE CAMUS
Academiæ Regiarum Rupellensis & Ambianensis, Societatisque Litteraria Catalaunensis Socius, atque Chirurgia Gallico Idiomate Professor designatus.

M. Franciscus PORTIER M. Dionysius PAUTIER M. Petrus ARCELIN, Scho-
DE LA HOUSSINIERE. DE LA BREUILLE, S. larum Professor.
Delphina, Medicus pri-
marinus.

Proponebat Parisiis JOANNES BAPT. LANGLOIS, Abrincensis, Doctor Medicus Remensis, necnon Sal. Facult. Medicinæ Parisiensis Baccalaureus,
A. R. S. H. 1766. A SEXTA AD MERIDIEM.

Typis QUILLAU, Universitatis & Facultatis Medicinæ Typographi. 1766.